

**ZAPISNIK O RADU SA
43. RADNE SJEDNICE SKUPŠTINE KANTONA SARAJEVO,
ODRŽANE 22.10.2021. GODINE SA POČETKOM RADA U 09,00 SATI**

Predsjedavajući Skupštine Kantona Sarajevo Elvedin Okerić (u daljem tekstu: Predsjedavajući) je pozdravio sve prisutne i otvorio 43. Radnu sjednicu.

Sjednici prisustvuje 27 zastupnika, što je dovoljan broj za punovažan rad i odlučivanje.

Sjednici su prisustvovali/le zastupnici/zastupnice:

SDA - STRANKA DEMOKRATSKE AKCIJE

1. Hamed Aljović
2. Jasmina Bišćević-Tokić
3. Haris Zahiragić
4. Mahir Dević
5. Amra Hasagić
6. Smiljana Viteškić

POLITIČKA ORGANIZACIJA "NAROD I PRAVDA"

1. Vedran Jakupović
2. Elmedin Konaković
3. Danijela Kristić
4. Amel Mekić
5. Arijana Memić
6. Elvedin Okerić

POLITIČKA ORGANIZACIJA GRAĐANA "NAŠA STRANKA"

1. Vildana Bešlija
2. Neira Dizdarević
3. Vibor Handžić

SOCIJALDEMOKRATSKA PARTIJA BOSNE I HERCEGOVINE

1. Segmedina Bajramović Srna
2. Igor Stojanović
3. Samir Suljević

SAVEZ ZA BOLJU BUDUĆNOST BIH – FAHRUDIN RADONČIĆ

1. Zvonko Marić
2. Dževad Poturak

DEMOKRATSKA FRONTA

1. Senad Hasanović

BOSS-BOSANSKA STRANKA – MIRNES AJANOVIĆ

1. Haris Pleho

SAMOSTALNI ZASTUPNICI/ZASTUPNICE:

1. Damir Nikšić
2. Fahrudin Pecikoza

3. Damir Marjanović
4. Elvis Vreto
5. Jasna Duraković
6. Aljoša Čampara
7. Amra Junuzović-Kaljić
8. Bilsena Šahman

Izostanak sa ove sjednice opravdali su zastupnik Mirza Čelik, zastupnik Sabahudin Delalić, zastupnica Admela Hodžić, zastupnik Sead Milavica i zastupnica Bibija Kerla. Kašnjenje je najavio zastupnik Fahrudin Pecikoza.

UTVRĐIVANJE DNEVNOG REDA SJEDNICE.

Prijedlog dnevnog reda 43. Radne sjednice Skupštine Kantona Sarajevo utvrdio je Kolegij Skupštine na sjednici održanoj dana 09.10.2021.godine.

Na osnovu navedenog prijedloga dnevnog reda 43. Radne sjednice glasi:

1. Poslanička/zastupnička pitanja inicijative i odgovori
2. Prijedlog odluke o potvrđivanju imenovanja ministrice Ministarstva za nauku, visoko obrazovanje i mlade Kantona Sarajevo

PREDSJEDAJUĆI JE POZVAO ZASTUPNIKE I ZASTUPNICE DA SE IZJASNE O PREDLOŽENOM DNEVNOM REDU. NAKON GLASANJA KONSTATOVANO JE DA JE SKUPŠTINA JEDNOGLASNO (29 “ZA”) USVOJILA DNEVNI RED ZA 43. RADNU SJEDNICU.

Dopredsjedavajući Vior Handžić se javio za riječ, te predložio da se redosljed 1. i 2. tačke zamijeni i taj prijedlog je prihvaćen sa 27 glasova “za”.

Usljedila je realizacija tačke 2.

AD – 2.

PRIJEDLOG ODLUKE O POTVRĐIVANJU IMENOVANJA MINISTRICE MINISTARSTVA ZA NAUKU, VISOKO OBRAZOVANJE I MLADE KANTONA SARAJEVO

Dopredsjedavajuća Danijela Kristić je podnijela uvodne napomene ispred Komisije za izbor i imenovanje i administrativna pitanja.

Zastupnik Mahir Dević se prvi prijavio za pitanja tražeći da se kandidatkinja za ministricu obrati Skupštini sa uvodnim izlaganjem, pa se umjesto kandidatkinje za ministricu Skupštini obratio premijer Edin Forto.

Nakon obraćanja premijera otvorena je diskusija u kojoj su učestvovali: zastupnica Jasna Duraković, zastupnik Elmedin Konaković, zastupnik Mahir Dević, zastupnik Damir Marjanović, zastupnica Segmedina Srna Bajramović, Dopredsjedavajući Vior Handžić, zastupnik Damir Nikšić, zastupnik Haris Zahiragić, zastupnik Vedran Jakupović, zastupnica Jasmina Biščević-Tokić, zastupnica Vildana Bešlija i zastupnik Zvonko Marić. U toku diskusije pojedini zastupnici su se obraćali više puta kroz replike i diskusije.

NAKON ISCRPLJENE LISTE PRIJAVLJENIH ZA RASPRAVU, PREDSEDVAJUĆI JE POZVAO ZASTUPNIKE DA PRISTUPE IZJAŠNJAVANJU O PRIJEDLOGU ODLUKE O POTVRĐIVANJU IMENOVANJA MINISTRICE MINISTARSTVA ZA NAUKU I VISOKO OBRAZOVANJE I MLADE KS.

NAKON GLASANJA, KONSTATOVANO JE DA JE 21 ZASTUPNIK GLASAO “ZA” TE DA JE 7 BILO “SUZDRŽANIH”. SKUPŠTINA JE OVU ODLUKU DONIJELA VEĆINOM GLASOVA.

NAKON DONOŠENJA ODLUKE, NOVA MINISTRICA MINISTARSTVA ZA NAUKU, VISOKO OBRAZOVANJE I MLADE KANTONA SARAJEVO ALEKSANDRA NIKOLIĆ JE PRISTUPILA DAVANJU SVEČANE IZJAVE:

“Svečano izjavljujem da ću povjerenju dužnost obavljati savjesno, pridržavati se Ustava i Zakona Bosne i Hercegovine, Federacije Bosne i Hercegovine i Kantona Sarajevo, zalagati se za ljudska prava i slobode, i da ću u svim prilikama štiti interese Bosne i Hercegovine, Federacije Bosne i Hercegovine i Kantona Sarajevo i ravnopravnost naroda i građana koji u njima žive.”

AD - 2.

POSLANIČKA/ZASTUPNIČKA PITANJA INICIJATIVE I ODGOVORI

Zastupnica Amra Hasagić je podnijela sljedeće: “S obzirom da se javljam prvi put, pozdravljam kolegice i kolege zastupnike, članove Vlade i sve one koji na bilo koji način prate rad današnje sjednice. Još jednom novoizabranoj ministrici želim sretan i uspješan rad i zasigurno sam da ćemo imati vrlo solidnu i uspješnu saradnju.

Upućujem pitanje Senatu Univerzitetu u Sarajevu koje glasi: Koje je službeno tumačenje izmjena Zakona o visokom obrazovanju Kantona Sarajevo usvojenih na zadnjoj Hitnoj sjednici Skupštine Kantona Sarajevo? Molim da mi se isto službeno dostavi uz prateće obrazloženje.

Upućujem pitanje Ministarstvu za boračka pitanja Kantona Sarajevo koje glasi: kakav je službeni stav Ministarstva po pitanju promjene imena okolnog kompleksa kasarne Šemso Baručija i da li je sve urađeno u skladu sa procedurama? Ja bih molila pismeni odgovor i dostaviti ću ostala pitanja u pisanoj formi. Zahvaljujem.”

Zastupnica Vildana Bešlija je podnijela sljedeće: “Ja ću pročitati jednu inicijativu. Naime, budući se svako treće dijete u dobi do četvrtog razreda osnovne škole susreće sa problemima poput skolioze, a razlog su preteške školske torbe, podnosim inicijativu da Ministarstvo za odgoj i obrazovanje pokrene projekat digitalizacije udžbenika za narednu školsku godinu koja će biti obavezna za svakog izdavača kao jedno od rješenja za dugogodišnji problem. Hvala vam.”

Zastupnik Dževad Poturak je podnio sljedeće: “Za danas imam nekoliko pitanja za direktora Opće bolnice gospodina Gavrankapetanovića ili za uvaženog ministra Vranića. Poštovani, kao što vam je jako poznato trudnica iz Sarajeva koja je u 21 sedmici trudnoće oboljela od teškog respiratornog distres sindroma prebačen je hitno u Zagreb zato što Opća bolnica “Prim. Dr. Abdulah Nakaš “ ne posjeduje ovakav medicinski aparat. Iz informacija koje su objavili mediji ovaj aparat posjeduje naš KC ali i bolnice u Tuzli, Banja Luci itd. Radi

se o aparatu koji košta kako je izjavio uvaženi prof.dr. Ismet Gavrankapetanović direktor OB, nekoliko desetina hiljada maraka. Da napomenem ECMO je invazivan postupak, njime se uz pomoć karaktera izvlači krv iz organizma, aparatu se zatim dodaje kisik, te ponovno vraća u organizam te tako se zamjenjuje rad plućima. Prema mojim informacijama na žiro računu OB već duže vrijeme se nalazi više od 3 miliona KM. Nekoliko pitanja u vezi ovoga. Zašto uvaženi menadžment ove ustanove nije već ranije ušao u nabavku ovog spasonosnog aparata jer je očigledno da finansijska sredstava nisu bila problem? Vjerujem da bi i Ministarstvo zdravstva i ZZO svakako bili odgovorni ako bi uopće bilo potrebe za nekim dodatnim finansijskim sredstvima jer se ne radi o preskupom aparatu, naročito kada se uzme u obzir da je pojedina medicinska oprema OB plaćena i više od milion KM po pojedinačnoj nabavci, što je neuporedivo skuplje od ovog aparata. Jedno pitanje je kada će nakon ovog iskustva sa oboljelom trudnicom i očekivanja da će zbog korone biti još hitnih potreba za ovom medicinskom procedurom, menadžment OB nabaviti ovaj uređaj i hitno ga staviti u funkciju? Također koristim priliku da kao zastupnik prenesem brojne upite koji dolaze do mene zašto porodice najteže oboljelih pacijenata moraju najskuplje lijekove Rendesivir, Tocilizumab moraju kupovati u privatnim apotekama, donositi ljekarima i onda po nekoliko mjeseci čekati da im ZZO to refundira? Postavljam pitanje isto tako zašto se preko bolničke apoteke i ovlaštenih farmaceutskih kuća ne izvrši direktna kupovina ovih i drugih lijekova direktno od proizvođača jer bi se time izbjegla zarada u koju se ugrađuju privatne apoteke i novac ZZO koji vrši refundaciju odnosno novac nas građana. Još nekoliko pitanja za iste. Jeste li obezbijedili da vam svi medicinski aparati budu zakonski verifikovani ili će te tretirati pacijente neispravnom opremom od kraja oktobra jer vam ističe rok valjanosti za sve aparate, što znači da će već krajem oktobra svi pacijenti da vas tuže jer ih tretirate neispravnom opremom? Hoće li se ovo možda desiti situacija kao i sa industrijskim kisikom u RS; što ja ne bih volio. I da li je ovo možda nagovještaj neke nove afere. Gospodina Ismet Gavrankapetanović ili uvaženi ministar Vranić da mi daju odgovore na ovih nekoliko pitanja koja su goruća ovih dana i nadam se kvalitetnom odgovoru i zahvaljujem predsjedavajući.”

Zastupnik Damir Marjanović je podnio sljedeće: “Jedan kratki uvod, prošle sjednice smo imali jako burnu diskusiju koja je trajala dugo u noć glede izmjena Zakona o visokom obrazovanju. Nakon te sjednice sam imao priliku da imam i jedan neformalni sastanak sa velikim brojem studenata ispred Skupštine, nekako se za njih najviše vezala ona priča da hoće bezuvjetni prelaz na drugu godinu. Međutim u toj diskusiji koja je trajala sigurno sat vremena, ti mladi ljudi su ipak u fokus stavili neke druge probleme i ja imam obavezu da ono što su oni rekli tu noć kao i što sam obećao da otprilike postavim pitanje ovdje. Odmah da kažem neću uzeti priliku kolegi Mariću koji je već napomenuo da će postaviti određena pitanja vezano za novac koji se izdvaja za biblioteku i novac za IT, ali moram priznati da me kao zastupnika definitivno zanima i očekujem stvarno od UNSA i ministrice da nam dostavi informacije o kojem iznosu je riječ i koliko novca je do sada prikupljeno i koliko je stvarno uloženo i koliko je opravdano bilo to uraditi posebno u proteklim godinama. Što se tiče druge stvari evo da se referiram kolegica Hasagić je postavila pitanje, ovdje ću zamoliti kolegu Aljošu Čamparu koji je predsjedavajući Ustavno pravne komisije da nam kaže zato što znam da su kolege iz SPUS podnijeli zahtjev za tumačenje izmjena Zakona zato što se ne slažu sa odlukom čini mi se Senata UNSA i mi smo ih uputili na tu proceduru, pa bih samo zamolio kolegu Čamparu da nam kaže u kojoj je fazi ta procedura. Maloprije sam ga kontaktirao i rekao je da će to definitivno uraditi. Ono što me sada zanima jeste da dobijem informaciju iz Ministarstva za visoko obrazovanje, nauku i mlade, a normalno da oni to potraže u menadžmentu UNSA, da li i kakvi su uvjeti studiranja za studente sa invaliditetom i da li i koliko treba da se uloži u optimizaciju uvjeta da bi se oni doveli na europske standarde? Druga stvar, zamolit ću Ministarstvo za visoko obrazovanje, nauku i mlade Kantona Sarajevo da provjere navode koje sam čuo a to je da pojedini profesori mimo Zakona prodaju svoje knjige na fakultetima. Hajde

što prodaju, nego uvjetuju da se te iste knjige moraju kupiti, i to uvjetuju da student koji ne kupi knjigu ne može da izađe na ispit ili malte ne pada. To prosto ne mogu da vjerujem kao član akademske zajednice da neko može biti tako neetičan, neprofesionalan. To su studenti naveli kao jedan od problema i ja ću stvarno zamoliti ministricu da to provjeri. I ako bude trebalo raditi nešto u tom pravcu, onda definitivno ću zamoliti ovu Skupštinu kada dobijemo i ovu informaciju da djelujemo. Nadalje, na tom sastanku spomenuto je da pojedini dekani šefovi odsjeka i uposlenici UNSA imaju enormna dodatna primanja na osnovu ugovora o djelu i na osnovu nekih projekata gdje koriste resurse UNSA za stvaranje dobiti. To je ono što nam je tada prezentirano. Molim Ministarstvo finansija i ministarstvo za visoko obrazovanje, nauku i mlade Kantona Sarajevo da nam dostavi pregled, ne mora, zaštititi ćemo mi osobne podatke, ali da li pojedini i koliko pojedini voditelji organizacionih jedinica menadžmenta, nebitno je, primaju imaju dodatna primanja i izvore tih primanja. Jer malo je nelogično, prosto nisam mogao da vjerujem da sada ne bih špekulisao nekim stvarima ali prosto nisam mogao da vjerujem da bi neko možda u pandemiji i ovoj godini mogao da isplati sebi desetine hiljada maraka na osnovu nekih ugovora o djelu i projektnih aktivnosti. I sada bih samo zamolio ministricu pravde, nedavno sam pročitao informaciju, vezao za odluku Ustavnog suda glede obustave postupka o razdvajanju ministarstva. Ja bih stvarno o zamolio kao član Skupštine Kantona Sarajevo samo da mi se pojasni ta odluka od nekoga ko je ekspert, a ministricu pravde zaista smatram ekspertom. Hvala velika.”

Zastupnica Jasmina Bišćević-Tokić je podnijela sljedeće: “Imala bih dva pitanja i molila bih usmene odgovore na oba. Prvi je za premijera Fortu zašto do sada već nije potpisan kolektivni ugovor radnika u zdravstvu jer poslije evo duže vremena više niko ne spominje taj kolektivni ugovor, pa bih molila premijera da mi usmeno odgovori.

I sljedeće pitanje imam za ministra Katicu, isto tako usmeni odgovor. Javili su mi se građani sa područja Reljeva i Dobroševića koji su zabrinuti zbog ukidanja PU u Reljevu. Kažu da je upravo otvaranjem ove PU stopa kriminala smanjena za 50%. prije par godina znamo svi da je u Reljevu ubijen policajac ispred crkve pravoslavne i građani su stvarno zabrinuti. Evo ja bih molila ministra Katicu da mi usmeno da pojašnjenje zašto se ide u zatvaranje ove PS? Zahvaljujem.”

Dopredsjedavajuća Smiljana Viteškić je podnijela sljedeće: “Ja imam jedno pitanje za ministricu odgoja i obrazovanja Kantona Sarajevo.

Na osnovu kojih kriterija su izabrani recezenti za curriculum i koji broj recezenata je radio na istom? Drugo, molim da nam se dostave zapisnici komisije koje je imenovala recezente i po kojim kriterijima. Treće, veći broj kandidata koji su se javili na Javni poziv i nisu izabrani bi se žalili ali ne znaju kome. I četvrto, imate li obrazloženje zašto se utrošio toliki novac na recezente oko 30.000,00KM, bar tako imam informaciju, kada su curriculum uradili eksperti. I pisani odgovor želim.”

Zastupnik Zvonko Marić je podnio sljedeće: “Na početku samo htio bih da se zahvalim Ministarstvu saobraćaja i ministru Šteti jer sam nekoliko puta pokretao inicijativu vezano za uspostavu željezničke stanice na relaciji Sarajevo – Pazarić gdje je veliko i ogromno i naselje također Vrelo Bosne to izletišta. I atraktivna destinacija. Međutim došlo je do malog nesporazuma čini mi se u terminologiji odnosno toponimima Blažuja i Binježeva i ministra Šteta je obećao da će razriješiti to pitanje i u to ime im se zahvaljujem ime onih koji će koristiti tu stanicu.

Međutim evo kolega Marjanović je rekao da ne želi da preuzima inicijativu koju sam već najavio a ona se odnosi na visoko obrazovanje. Ja pokrećem inicijativu, obavezuje se Ministarstvo visokog obrazovanja da u suradnji sa komisijom za visoko obrazovanje, opet kolega Marjanović, i predstavnicima studenata izvršne nadzor nad

provođenjem Zakona o visokom obrazovanju u svezi sa normama koje se odnose a plaćanje članarine u bibliotekama, tretiranju studenata sa poteškoćama on ih je pomenuo, u razvoju i također studenata sa invaliditetom, i isto tako da izvrše nadzor nad naplatom 20 KM za potrebe ISSS. Također poznato je da zbog specifičnih okolnosti u kojima se odvijala nastava studenti nisu koristili kapacitete za vježbe a naplaćivano im je. I na kraju krajeva stoga pokrećem inicijativu da Ministarstvo resorno i Vlada naravno , razmotre procentualno smanjenje školarine za akademsku 2021/22 za te studente. Samo za tu godinu jer ima je naplaćeno prošle godine ono što nisu koristili uopće. I molim ministricu. Eto nije neki teret niti pritisak ali da se ima u vidu tu. I naravno bila je velika ministrice konfuzija za prenos predmeta u akademske godine u smislu da barem ujednačite stavove sa Senatom, odnosno ovo Ministarstvo a ne jedno Senat odluči, prvo jedno pa onda drugo, onda izazove konfuziju, haos među studentima i njihovim roditeljima. To je zaista neprimjereno, nedopustivo. Dati im treba pravu informaciju a ne da iščekuju da se nečemu nadaju. I na koncu, evo za predsjedavajućeg koji je predsjedavajući Komisije za sigurnost, ali i ministra Katicu i Vladu, evo premijer Forto je tu, da mi odgovori, da li ste planira zamjena uniformi za policiju jer zaista je pohabana te uniforme. One nisu u skladu sa onom Uredbom, vi to znate, također i sa obućom. Već osam, devet godina. Da li se planira premijeru u budžetu ili na bilo koji način da se zanovi ta oprema, jer ljudi po osam godina nose istu opremu, uniformu. Kako se to zove radno-taktičku uniformu, obuću, itd.. to je zaista nedopustivo i urušava nekako ugled i policije, a znamo šta je policija i kakav je faktor u jednom društvu. I zato vas molim da samo odgovorite na to pitanje da li planirate u novom budžetu takvu neku stavku da se to učini i da se prilagodi. Eno obuća nije u skladu sa Uredbom važećom, također. I osim toga novi zaposlenici nemaju fluorescentne prsluke kada osiguravaju, vidio sam neki događaj ili slično. I završit ću ovim, pa samo da date odgovor jer je zaista ponižavajuće da se ne desi da se nabave uniforme kao što je u vrijeme Muhameda Budimlića ministra rečeno da su radioaktivne a onda su podijeljene USK i BPK i Posavskom Kantonu. Zaista da ne dolazi do takvih neprimjerenih situacija pa ako može da mi odgovorite na to pitanje. Hvala vam.”

Zastupnica Bilsena Šahman je podnijela sljedeće: “Imam par inicijativa, ne želim da se danas izjašnjavamo jer za neke je potrebno i finansijska sredstava. Molim ministre u Vladi Kantona Sarajevo da svako u svom resoru, odnosno ustanova i preduzećima kojima upravljaju vrata radno vrijeme uposlenika na period prije pandemije jer svakodnevno smo svjedoci dugačkih redova ispred poslovnica Pošte, jedinica za naplatu „Toplane,, Sarajevogas,, „Vodovod,, Apoteke ,, I ostale ustanove gdje naši sugrađani plaćaju račune i obavljaju poslove važne za svakodnevno funkcionisanje I normalan život. Iako još uvijek imamo prijetnju od virusa ipak su brojke na sreću male I trebamo se vraćati u realan život.

Druga inicijativa je prema ministru saobraćaja. Poštovani ministre ako možete da krenete sa promocijom automobila na električni pogon. Građani koji imaju stare automobile a žele ih zamijeniti sa autima na električni pogon, da dobiju novčani podsticaj pri kupovini ili da budu oslobođeni poreza ili da se razmotri podsticaj za taksi prevoznike kako bi prešli na upotrebu ovakvih vozila jer na ovaj način štitimo životnu sredinu a i smanjujemo zagađenje.

Jedno pitanje za ministra Vranića. Da li ste upoznati sa situacijom u ambulanti Kovači u kojoj se već neko vrijeme smještena ambulanta za fizikalnu terapiju. Jutros sam bila tamo. Jako su loši uslovi, puno je pacijenata, neuslovno je, daleko je od gradskog prevoza. Naši pacijenti tu moraju doći ili taksijem ili sopstvenim prevozom. I ako može da se podhitno vrata na lokalitet gdje su u prije radili, a to je Vrazova gdje su zapravo i svi instrumenti koji su im potrebni.

Inicijativa prema Vladi Kantona ukoliko može da se izdvoje sredstva da se plate članarine učenicima i studentima koji nemaju uslove za učenje u svom domu jer nemaju računare ili knjige. Mladi koji su napravili homework obratili su se i ponudili su svoje prostorije. Molbu su poslali, ja je prosljeđujem uz svoju inicijativu. Molim da se ta molba razmotri. Zahvaljujem.”

Zastupnica Neira Dizdarević je podnijela sljedeće: “Ja ću uputiti samo jednu inicijativu prema menadžmentu Doma zdravlja i molit ću hitno preispitivanje navodne odluke menadžmenta JU Dom zdravlja KS za angažovanje logopeda i osoblja Centra za mentalno zdravlje u Covid ambulancama i na procesu vakcinacije građana KS. Naime obratili su mi se roditelji mališana čijoj djeci je neophodan tretman logopeda pri Domu zdravlja, ovo osoblje, koje je godinama deficitarno, je raspoređeno navodno u Covid ambulante . Usljed navedenog, dostupni termini su još rjeđi, u nekim slučajevima čak i potpuno odgođeni. Opće je poznata činjenica da je kod ove djece napredak jako spor, a nazadovanje ubrzano, što još više naravno usložnjava ovu situaciju. Također, prema informacijama kojima raspolazem, u istoj situaciji se nalazi i osoblje Centara za mentalno zdravlje, što je posebno problematično u ovom (post) pandemijskom periodu, kada sve više naših sugrađana treba ovu vrstu pomoći i podrške. Navedena praksa nije bila uobičajena ni u periodima puno teže epidemiološke situacije u KS, kada smo dnevno imali i po 1000 novooboljelih u KS. Također, Vlada KS je u više navrata izlazila u susret i podržavala kadrovsko jačanje ustanove. Na bazi navedenog, smatram da je potrebno preispitati potrebu ovakvog angažovanja navedenog osoblja, posebno uzimajući u obzir naravno ranjivost populacije na koju ovakve odluke imaju najveći uticaj. Toliko, hvala.”

Zastupnica Jasna Duraković je podnijela sljedeće: “Ja za danas imam jednu inicijativu i nekoliko pitanja. Pa evo počeo ću sa inicijativom. Podnosim inicijativu prema Vladi KS i Ministarstvu zdravstva KS da u roku od sedam dana odobri popunjavanje svih upražnjenih radnih mjesta u Domovima zdravlja u KS, za koja već postoje obezbijedena finansijska sredstva od strane Zavoda zdravstvenog osiguranja, a koja su u ovom trenutku prazna zbog objektivnih okolnost poput odlazaka u penziju, samovoljni odlazaka i drugi razloga. Obrazloženje: Postoji opravdana potreba da se popune ova radna mjesta neophodnim medicinskim kadrom jer postoje obezbijedena sredstva od strane ZZO, kao i prijevremena potreba da se u složenoj epidemiološkoj situaciji u KS, koja se i dalje usložnjava i vidjet ćemo da će to biti problem vjerovatno od novembra mjeseca, dakle potreban je veći broj ljekara, medicinskih sestara i drugog deficitarnog medicinskog kadra koji su neophodni za rad u Domovima zdravlja u KS. Potrebno je ovdje promptno krenuti u realizaciju ove inicijative kako bi se našim građanima omogućila kvalitetnija medicinska usluga i olakšao put pacijenta. I evo nekoliko pitanja koje ću uputiti kako premijeru, tako i ministru privrede. Da li postoji plan Vlade KS za suzbijanje divljanja cijena hrane, vidimo da je to zaista veliki problem u posljednjih par mjeseci su jako skočile cijene hrane, osnovnih namirnica, kojim svjedočimo, naročito je ovo poskupljenje zapaženo u poljoprivrednim proizvodima? Da li Vlada KS može djelovati sa povećanjem podsticaja za poljoprivredu, povećanjem zasijanih površina i drugim sličnim mjerama? Postoji li spreman plan da se na vrijeme djeluje? Toliko za danas, zahvaljujem. I tražim usmeni odgovor ako nije problem.”

Zastupnik Samir Suljević je podnio sljedeće: “Imam zastupničko pitanje koje upućujem Ministarstvu za komunalnu privredu. Kako je funkcionisanje deponije Smiljevići, jedan od ključnih problema KJKP „Rad“, d.o.o. Sarajevo, postavljam zastupničko pitanje dokle se došlo sa realizacijom Projekta, definisanih vodnom i okolinskom dozvolom, na deponiji Smiljevići, koji su tretirani Zaključkom Skupštine KS i Vlade KS, od 27.06.2019. godine, a do sada nisu realizovani, niti su preduzete adekvatne mjere i aktivnosti za realizaciju, do roka utvrđenog dozvolama. To su projekti na izgradnji postrojenja za predtretman podzemnih voda deponije Smiljevići i izgradnja kolektora Zabrđe-Butila, od kojih zavisi funkcionisanje deponije Smiljevići. Kako je i projekat za izgradnju, kao i sama izgradnja novih ploha za komunalni otpad u velikom kašnjenju, može se desiti da Deponija, na proljeće, neće imati kapacitet za dalje odlaganje. Takođe me interesuje da mi se da

informacija o tome, da li će planirana sredstva za 2022. godinu biti dovoljna da se ispune uslovi Vodne i Okolinske dozvole, na koje se Vlada KS obavezala?

Također podnosim inicijativu Ministarstvu za rad socijalnu politiku, raseljena lica i izbjeglice Kantona Sarajevo, kao i Općini Novo Sarajevo da Skupština Kantona Sarajevo zaduži Ministarstvo za rad, socijalnu politiku, raseljena lica i izbjeglice, da u suradnji sa Općinom Novo Sarajevo, što hitnije, nađe adekvatan prostor za smještaj Službe socijalne zaštite općine Novo Sarajevo, koja je u sastavu JU „Kantonalni centar za socijalni rad”. Imajući u vidu da uposlenici Službe socijalne zaštite općine Novo Sarajevo, duži niz godina rade u neadekvatnim prostorijama, podijeljenim u dva različita, nefunkcionalna objekta, od kojih, jedan to je ona podsjećam u objektu Taxi doma Hrasno ima nefunkcionalan prilaz, kako za uposlenike, tako i za korisnike usluga Centra, smatram da je krajnje vrijeme da se ovaj problem riješi, na način iznalaženja adekvatnog prostora. Smatram da Ministarstvo za rad, socijalnu politiku, raseljena lica i izbjeglice, u suradnji sa Općinom Novo Sarajevo, ovaj problem može brzo riješiti, te da im za isto ne treba više od 6 mjeseci. Hvala.”

Dopredsjedavajuća Danijela Kristić je podnijela sljedeće: “Ovim putem podnosim inicijativu da se u 2022.godini obezbijede sredstva da se osnovnim i srednjim školama provede projekata obavezne obuke iz kardiopulmunalne reanimacije za školsku djecu. Obrazloženje. Iznenađni srčani zastoj treći je najčešći uzrok smrti i najčešće se dešava izvan bolnice . Stope preživljavanja su obično 2% -10% nakon srčanog zastoja izvan bolnice. Ako obučene osobe koje su svjedoci naglog srčanog zastoja odmah pokrenu kardiopulmonalne reanimaciju (CPR), stope preživljavanja mogu se drastično povećati. Nakon naglog srčanog zastoja, moždane ćelije mogu tolerirati samo 3-5 minuta bez kisika. U gotovo svim slučajevima to je mnogo manje vremena od vremena potrebnog za dolazak hitne medicinske pomoći. Najbolji način da se poveća broj ljudi koji znaju započeti kardiopulmonalnu reanimaciju je tako što se djeca počnu obučavati u osnovnoj školi. Oni tada potrebne vještine nauče za čitav život a odlični su multiplikatori jer znanje prenesu na porodicu, prijatelje.

Drugu inicijativu koju podnosim. Ovim putem podnosim inicijativu a sanaciju, obnovu i adaptaciju toaleta u PRVOJ OSNOVNOJ ŠKOLI ILIDŽA. Obrazloženje: Navedenu inicijativu sam podnosila u 10.2019. godine, na koju je Ministarstvo odgovorilo da će se sredstva obezbijediti u 2020.godini. S obzirom da do današnjeg dana nije i vršena adaptacija, ponovo podnosim inicijativu i slike šaljem u prilogu. Učenički toaleti u navedenoj školi su u jako lošem stanju. Obzirom da je problem starih, dotrajalih instalacija i opreme u sanitarnim prostorijama škole prisutan već duži period, nadam se da će MONKS pristupiti rješavanju ovog problema. Zahvaljujem.”

Zastupnik Senad Hasanović je podnio sljedeće: “ Evo cijeneći vrijeme ja ću usmeno postaviti samo jedno pitanje dok ću preostala dostaviti u pisanoj formi. Upućujem pitanje Ministarstvu unutrašnjih poslova. Vrlo slično pitanje je postavio i kolega Zvonko Marić, ali zbog važnosti teme ja ću pročitati svoje pitanje koje glasi: Molim za informaciju da li je u toku proces izmjena pravilnika o policijskim uniformama iz 2013 godine ili izrada novog pravilnika i kada se može očekivati da se na tendere za nabavku uniformi policijskih službenika mogu prijaviti i domaće firme koje proizvode uniforme? Na ovo pitanje molit ću pisani odgovor. Toliko i hvala.”

Zastupnik Hamed Aljović je podnio sljedeće: “Moje pitanje je upućeno prema ministru za saobraćaj Kantona Sarajevo. Da li je tačno da u projektu rekonstrukcije tramvajskih stajališta stoji da se uzemljenje od stajališta vezuje za šine tramvajske pruge? Zahvaljujem.”

Zastupnik Mahir Dević je podnio sljedeće: “Ministarstvu privrede. Zašto je poništen najtransparentniji konkurs u KJ Sarajevo šume i da li su ostali isti uposlenici koji su radili

prije toga koji su bili uposleni po stranačkoj liniji. Molim odgovor od ministra privrede Kantona Sarajevo. Ministarstvu za boračka pitanja pokrećem inicijativu da se izradi elaborat zaštite ratne džamije na Selištu, Čemerska planina mjesto Karaula. Mislim da ministar za boračka pitanja poznaje ovu lokaciju i da se napravi elaborat u ovoj budžetskoj godini o zaštiti navedenog lokaliteta. Kada će se konačno otvoriti OŠ na Šipu i zašto do sada nije otvorena? Da li imamo menadžment te škole u praznoj školi da radi i dobija platu kao što se to nekada u medijima predstavljalo? Ministarstvu obrazovanja. Vlada Kantona Sarajevo je odobrila četiri radna mjesta za konkurs u Ministarstvu za obrazovanje. Jedan je u toku, tri nisu iz kog razloga? Ali su angažovani ljudi na ugovor o djelu. Da mi se objasni njihov opis poslova i visina primanja koje imaju u tom ministarstvu. Ministarstvo MUP. Kada će se konačno otvoriti PU Srednje koja je izgrađena već duži vremenski period i stoji neotvorena. Ministarstvu kulture i sporta, kada ćete konačno ministre uplatiti 100.000 KM za izgradnju gradskog stadiona u Ilijašu, s obzirom da su to vrlo minorna sredstva u odnosu na projekat koji se realizira? Prema našim informacijama to još niste uradili a evo nalazimo se već što kažu s izvršenjem budžeta u posljednjem kvartalu. Želim usmeni odgovor na sva ova pitanja. Hvala.”

Dopredsjedavajući Vjedor Handžić je podnio sljedeće: “Dvije ću inicijative, odnosno inicijativu i pitanje i pročitati, a ostalo ću sve dostaviti u pismenom obliku. Podnosim inicijativu prema Ministarstvu saobraćaja Kantona Sarajevo i Direkciji za ceste KS za izradu i realizaciju projekta produženja postojećih isključnih traka prema naseljima na magistralnom putu M-18, koji prolazi kroz Grad Sarajevo i Općinu Ilidža. Ministarstvo saobraćaja je nedavno radilo jedan sličan projekat ali evo ja ovo je inicijativa za sveobuhvatni projekat. Obrazloženje: svjedočimo svakodnevnim gužvama na sarajevskoj centralnoj longitudinali, jednoj od najprometnijih saobraćajnica u Federaciji Bosne i Hercegovine. Iste nastaju zbog prevelike opterećenosti isključnih traka sa lijeve strane kolovoza u oba smjera magistralnog puta. Vjerujem da nadležno Ministarstvo i Direkcija imaju odličan uvid u otežanu prohodnost saobraćaja na navedenoj saobraćajnici. Pozivam vas da u saradnji sa Federalnim ministarstvom saobraćaja i JP Ceste Federacije BiH pripremite projekt produženja isključnih traka kako bi se saobraćaj rasteretio. Prema nekoj mojoj procjeni najveće gužve stvaraju se iz jednog pravca na isključenjima prema Dobrinji, Alipašinom polju, Grbavici, Otoci, Ilidži i drugom smjeru prema Pofalićima, Marijin Dvoru, Čengić Vili i Dolac Malti. I drugo moje pitanje za ministra Vranića. Ovo što je pitala i zastupnica Šahman. Ja sam dobio upite od par korisnika vezano za ambulantu za fizikalnu terapiju koja je bila u Vrazovoj za područje Opštine Centar a prebačena je u prostorije na Kovačima. Koliko sam shvatio, jako nisu dobri uslovi za tu aktivnost koja se treba provoditi. To je jedno pitanje da se to vrati i zašto se gore prebacilo? I drugo je pitanje zašto je ambulanta za fizikalnu terapiju za područje opštine Centar prebačena na teritorij opštine Stari Grad? Zahvaljujem.”

Zastupnica Segmedina Srna Bajramović je podnijela sljedeće: “Pa ja ne tražim usmeni odgovor danas. Pokrećem tri inicijative. Prva je Uredu za borbu protiv korupcije da u saradnji sa resornim ministarstvom i nadležnom inspekcijom prikupi sve informacije kako bi se utvrdila zakonitost ishođenja dokumentacije za skladište kerozina na Dobrinji, s aspekta potencijalnih koruptivnih aktivnosti. Više je nego evidentno da građani vrlo jasno i javno ukazuju kako se radi o bespravnoj i nelegalnoj gradnji vrlo opasnog skladišta kerozina, što smo dužni detaljno provjeriti u smislu provođenja zakonom definisanih procedura. Također, pozivam nadležno ministarstvo da po funkciji nadzora dostavi svu neophodnu dokumentaciju sa svoje strane, te učini sve kako bi se navedeni projekat preispitao, jer profit bilo koga u ovoj zemlji ne smije biti ispred sigurnosti naše djece i zdravlja svih nas. Očekujem od nadležnih da održe sastanke sa građanima koji već mjesecima pokušavaju upozoriti institucije ove zemlje kako su njihova ljudska prava ugrožena.

Druga inicijativa je prema resornom Ministarstvu da se dostavi spisak svih zgrada u vlasništvu kantona, koje nisu u sistemu grijanja JP Toplane ili ne koriste plin kao gorivo. **Obrazloženje:** S početkom zime i grejne sezone, u Sarajevo se vrati stari-novi problem pod imenom “zagađenje zraka“. Tako je za očekivati da će Sarajevo opet biti prvo na listi glavnih i velikih gradova svijeta sa najvišim indeksom zagađenosti zraka prema specijaliziranoj internetskim stranicama. Opšti cilj spiska je utvrđivanje prioriternih objekata na području Kantona Sarajevo koje smo dužni toplificirati modelom koji će doprinijeti smanjivanju zagađenja zraka. Jasno je da smo dužni krenuti od sebe kako bi imali legitimitet i kredibilitet u provođenju kampanja za podizanje opšte svijesti građana.

I moja treća inicijativa. Uzimajući u obzir da se nalazimo u kontinuiranoj borbi protiv Covid 19 koji je u svojim posljedicama izuzetno nepredvidiv, svjedoci smo da postoje stanja kada i respirator nije dovoljan da obezbijedi adekvatnu gasnu razmjenu, a bolesnik je i dalje životno ugrožen zbog neadekvatne oksigenacije organizma. Ovim putem pokrećem inicijativu prema Vladi KS da u saradnji sa ZZO KS i zdravstvenim ustanovama izvrši analizu potreba ECMO aparata u zdravstvenim ustanovama KS, te da u skladu sa rezultatima analize ukoliko se ukaže potreba pokrene proceduru nabavke ECMO aparata koji će omogućiti dodatni nivo opremljenosti u borbi zdravstvenih radnika sa teškim kliničkim slikama pacijenata, gdje respirator nije dovoljan. Toliko. Zahvaljujem.”

Zastupnik Elvis Vretoje podnio sljedeće: “Ja danas imam dvije inicijative. Prvu upućujem prema Vladi i Ministarstvu komunalne privrede, infrastrukture, prostornog uređenja, građenja i zaštite okoliša, kao i JU Za zaštićena prirodna područja KS Zavod za izgradnju KS. A odnosi se na za izgradnju novog i većeg parking prostora na Vrelu Bosne, rekonstrukciju postojećeg i planiranje sredstava u Budžetu za narednu 2022. godinu. **Obrazloženje:** Svjedoci smo da u ljetnoj sezoni, često znaju biti velike saobraćajne gužve na Vrelu Bosne zbog problema sa parkiranjem motornih vozila, posebno u dane vikenda. Veliki broj posjetilaca želi motornim vozilom do postojećeg parking prostora a što često uzrokuje gužve i zastoje. Obzirom na navedeno tražim od Ministarstva da razmotri inicijativu, zajedno sa Javnom ustanovom i Zavodom za izgradnju KS a ukoliko istu podržava, da krene ka rješavanju ovog problema uz planiranje sredstava za narednu budžetsku godinu. Navest ću nekoliko razloga zbog kojih podnosim navedenu inicijativu sa prijedlozima možda budućih rješenja na razmatranje: 1. Novi parking prostor treba biti planiran i izgrađen po najnovijim tehnologijama zaštite okoliša a trebao bi se planirati što bliže raskrsnici kod skretanja prema Vrelu Bosne sa magistralne ceste. (M17) Trenutni parking prostor se nalazi u nukleusu spomenika prirode Vrelo Bosne, odnosno u zoni zaštite prirode kao i u vodozaštitnoj zoni, isti je neophodno rekonstruisati i zadržati kao prostor za parkiranje minibusa i autobusa kod organizovanih posjeta Vrelu Bosne. Ovim rješenjem će se višestruko smanjiti broj vozila u ovoj zoni, te doprinijeti i boljoj zaštiti izvorišta. Rekonstrukciju izvršiti uz upotrebu najnovijih tehnologija, ugradnjom bioprečistača na postojećem parking u ciljem što bolje zaštite samog izvorišta i prirode u cjelini. Trenutnu pristupnu saobraćajnicu u dužini od oko 800 metara zatvoriti za saobraćaj uz omogućen prolaz autobusima kod organizovanih posjeta i za motorna vozila stanovnika tog područja. Po uzoru na Bijambare, turističkim vozićem posjetiocima omogućiti i alternativni način prevoza do samog Vrela Bosne. Novi parking prostor planirati i izgraditi uz prethodno rješavanje imovinsko pravnih odnosa od strane Zavoda za izgradnju a u saradnji sa Općinom Ilidža. Izgradnja novog i većeg parkinga na ulazu sa magistralne ceste stvoriti će i bolje preduslove za korištenje pojasa između Vrela Bosne i Rimskog mosta, uređenjem dodatnih šetnica, novih ulaza, a što će dodatno upotpuniti sadržaj za posjetioce. Jedna od opcija koju treba uzeti u obzir za buduće održavanje parking prostora je možda i koncesija, što bi moglo dodatno doprinijeti i punjenju budžeta KS. Tražim od Vlade KS, konkretno resornog ministarstva, Javne ustanove i Zavoda da inicijativu

zajednički razmotre, u slučaju podrške da odmah pristupe implementaciji kroz planiranje sredstava, izradu idejnog rješenja i javne prezentacije.”

Zastupnik Haris Zahiragić je podnio sljedeće: “Imao bih nekoliko pitanja s tim da moram podsjetiti na inicijativu koju sam podnio na pretprošnoj sjednici Skupštine Kantona Sarajevo da se FK Željezničar dodijeli 100.000 KM. Nismo se o njoj izjašnjavali jer smo čekali mišljenje Vlade. Nadam se da je Vlada dala svoje mišljenje. Ali u svakom slučaju tražit ću da se o toj inicijativi ovdje danas izjašnjavamo.

Drugo zastupničko pitanje koje bih postavio je DZ i Ministarstvu zdravstva. Zašto su već drugi put u toku pandemije Centar za fizikalnu i medicinsku rehabilitaciju opštine organizacije DZ Centar ili organizacione jedinice DZ Centar, prebacili na Kovače? To je ambulanta koja nije adekvatno za takvu vrstu medicinskih usluga a imajući u vidu činjenicu da je veliki broj korisnika tih usluga zapravo RVI i invalidi generalno. Da je do ambulante na Kovačima onemogućen javni prijevoz, da nema adekvatan parking itd. Te se nadam da će ta stvar biti riješena na zadovoljstvo i DZ ali i organizacione jedinice medicinsko fizikalne rehabilitacije zbog čega su upali u veliki problem. Imao sam dopise i boračkih udruženja i velikog broja korisnika tih usluga, pa i samih uposlenika tog centra.

Imam pitanje za premijera Fortu. Moram vas podsjetiti prije nešto više, čini mi se u martu smo na moju inicijativu usvojili zaključak kojim smo obavezali Vladu da popularnom Ramizu, sarajevskom beskućnikom dodijelimo manji uslovan stan na korištenje. Tada smo svi to izglasali međutim do dana današnjeg ništa tim povodom nije urađeno. Čovjek i dalje živi na ulici a zima samo što nije došla. Ja nisam želio da od te teme političku temu, na žalost ona je dospjela tada u javnost i sada građani Kantona Sarajevo opravdano zamjeraju i meni koji sam podnio inicijativu i nama u Skupštini iako mi više nemamo ni jednu nadležnost. Mi smo usvojili zaključak jednoglasno, moram pohvaliti sve kolege ali Vlada nikada nije ni pokušala implementirati taj zaključak. S tim u vezi molim je, i molim premijera Fortu da zaključke Skupštine koji su obvezujući za Vladu Kantona Sarajevo, a takav sigurno jeste, da ga implementiraju odmah dok nisu došli novi minusi, jer građani Kantona Sarajevo svaki dan kada vide Ramiza na ulici, prestanu vjerovati u institucije ove države. U konkretnom slučaju ovog Kantona. Ne želim da pravim medijsku temu od toga i molim vas i nadam se da će premijer Forto ipak naći za shodno da ispoštuje taj zaključak Skupštine. Kada je u pitanje odgovor ministra Vranića na pitanje o Listi lijekova, usmeno sam dobio odgovor. Opet nisam dobio zapisnik komisije. Dobio sam narativno odgovor, a nisam dobio odgovor da li postoji zapisnik. Sve su prilike da ne postoji. Pa eto molim i usmenim putem da mi se dostavi pismeni odgovor konkretno vezano za zapisnik komisije za listu lijekova.

I ono što na kraju, imao bih više inicijativa i pitanja, spremio sam ih, poslat ću ih u pisanoj formi, ono što ne mogu a da ne kažem ovdje da iskoristim priliku dok govorim da prije nekoliko minuta, prije petnaestak minuta, na skupštinskim hodnicima kolega Amel Mekić mi je opsovao mater i prijetio mi je da će me fizički udariti štocem, citiram. S tim u vezi podnosim inicijativu da ga prijavim. Predsjedavajući molim vas, predsjedavajući na hodniku se izvršio.”

Zastupnik Zvonko Marić je imao poslovničku interveniciju ukazujući na to da u skupštinskoj sali nema dovoljno zastupnika i zastupnica za nastavak rada.

PAUZA POLA SATA NA ZAHTJEV KLUBA SDA.

NASTAVAK NAKON PAUZE

Zastupnik Mahir Dević je ispred Kluba zastupnika SDA dao obrazloženje pauze te informisao da Klub neće učestvovati u nastavku rada ove sjednice.

Rad na 43. radnoj sjednici Skupštine Kantona Sarajevo je prekinut zbog nedostatka kvoruma u toku realizacije 1. tačke dnevnog reda.

Zapisnik izradila:
Jasminka Deliahmetović

SEKRETAR
SKUPŠTINE KANTONA SARAJEVO

Aida Zeković, dipl. pravnik

PREDSJEDAVAJUĆI
SKUPŠTINE KANTONA SARAJEVO

Elvedin Okerić

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.

**ZAPISNIK O RADU SA NASTAVKA 43. RADNE SJEDNICE
SKUPŠTINE KANTONA SARAJEVO ODRŽANE 03.11.2021.GODINE**

Predsjedavajući Skupštine Kantona Sarajevo Elvedin Okerić (u daljem tekstu: Predsjedavajući) je pozdravio sve prisutne i otvorio nastavak 43. Radne sjednicu.

Sjednici prisustvuje 25 zastupnika, što je dovoljan broj za punovažan rad i odlučivanje.

Sjednici su prisustvovali/le zastupnici/zastupnice:

SDA - STRANKA DEMOKRATSKE AKCIJE

1. Hamed Aljović
2. Jasmina Bišćević-Tokić
3. Haris Zahiragić
4. Mahir Dević
5. Amra Hasagić
6. Smiljana Viteškić

POLITIČKA ORGANIZACIJA "NAROD I PRAVDA"

1. Vedran Jakupović
2. Elmedin Konaković
3. Danijela Kristić
4. Amel Mekić
5. Arijana Memić
6. Elvedin Okerić

POLITIČKA ORGANIZACIJA GRAĐANA "NAŠA STRANKA"

1. Vildana Bešlija
2. Vibor Handžić

SOCIJALDEMOKRATSKA PARTIJA BOSNE I HERCEGOVINE

1. Segmedina Bajramović Srna
2. Igor Stojanović
3. Samir Suljević

SAVEZ ZA BOLJU BUDUĆNOST BIH – FAHRUDIN RADONČIĆ

1. Zvonko Marić
2. Dževad Poturak

DEMOKRATSKA FRONTA

1. Senad Hasanović
2. Bibija Kerla
3. Sead Milavica

SAMOSTALNI ZASTUPNICI/ZASTUPNICE:

1. Damir Nikšić
2. Fahrudin Pecikoza
3. Damir Marjanović
4. Elvis Vreto
5. Jasna Duraković

6. Aljoša Čampara
7. Admela Hodžić
8. Amra Junuzović-Kaljić
9. Mirza Čelik
10. Bilsena Šahman

Izostanak sa ove sjednice opravdali su zastupnica Neira Dizdarević, zastupnik Sabahudin Delalić i zastupnik Haris Pleho.

Predsjedavajući je podsjetio da je na prethodnom zasjedanju obrađena tačka 2. Dnevnog reda Prijedlog odluke o potvrđivanju imenovanja ministrice Ministarstva za nauku, visoko obrazovanje i mlade Kantona Sarajevo, te da je na tački 2. Poslanička/zastupnička pitanja i inicijative i odgovori iscrpljena listu prijavljenih zastupnica i zastupnika za podnošenje pitanje i inicijativa, te da su ostali još odgovori članova Vlade Kantona Sarajevo na postavljena pitanja. Stoga će se nastaviti sa realizacijom prve tačke dnevnog reda.

AD- 1.

POSLANIČKA/ZASTUPNIČKA PITANJA, INICIJATIVE I ODGOVORI

Predsjedavajući je pozvao članove Vlade da daju odgovore na pitanja za koje je tražen usmeni odgovor.

Odgovore na pitanja dali su ministrica pravde i uprave Darja Softić-Kadenić, ministar kulture i sporta Samir Avdić i ministar privrede Adnan Delić. Svi odgovori su sadržani u stenogramu ove sjednice.

Nakon obraćanja ministara i ministrice, diskusiju i dodatna pitanja, te nezadovoljstvo odgovorima imali su zastupnik Mahir Dević, zastupnik Dževad Poturak, zastupnik Zvonko Marić i zastupnik Sead Milavica.

U nastavku sjednice Skupštini su se obratili i premijer Edin Forto, ministar zdravstva Haris Vranić, ministar unutrašnjih poslova Admir Katica, ministrica za odgoj i obrazovanje Naida Hota-Muminović:

Predsjedavajući je infomisao da je završen dio odgovora na poslanička pitanja te je podsjetio na inicijativu od zastupnika Zvonke Marića za koju se Skupština nije izjasnila pa je istu stavio na glasanje.

“Obavezuje se Ministarstvo visokog obrazovanja da u saradnji sa Komisijom za visoko obrazovanje i predstavnicima studenata izvrše nadzor nad provođenjem Zakona o visokom obrazovanju u vezi sa normama koje se odnose na plaćanje članarine bibliotekama, tretiranju studenata sa poteškoćama u radu i studenata sa invaliditetom na UNSA. Isto tako da izvrše nadzor nad naplatom 20 KM za potrebe sistema. Također zbog pandemije nastava se odvijala u specifičnim okolnostima bez mogućnosti da studenti koriste kapacitete za vježbe, no i pored toga studenti su morali platiti za nešto što nisu koristili. Budući da su mnogi diskriminirani zbog odluke da ne mogu prenositi predmete u željenu akademsku godinu, a imajući u vidu da im je nanesena materijalan šteta podnosim inicijativu da Senat UNSA, UO UNSA i Vlada Kantona Sarajevo razmotre procentualno smanjenje školarine za akademsku 21/22 godinu.”

SKUPŠTINA KANTONA SARAJEVO JE USVOJILA OVU INICIJATIVU ZVONKA MARIĆA, JEDNOGLASNO SA 26 “ZA”.

S obzirom da su iscrpljene sve tačke današnje sjednice predsjedavajući je zaključio rad na 43. Radnoj sjednici Skupštine Kantona sarajevo.

Zapisnik izradila:
Jasminka Deliahmetović

SEKRETAR
SKUPŠTINE KANTONA SARAJEVO

Aida Zeković, dipl. pravnik

PREDSJEDAVAJUĆI
SKUPŠTINE KANTONA SARAJEVO

Elvedin Okerić

Sastavni dio ovog zapisnika su stenografske bilješke, audio snimak sjednice, koji se čuvaju u Službi za skupštinske poslove Skupštine Kantona Sarajevo.